

欽
定
全
唐
文

欽定全唐文卷四百八十五目錄

權德輿 三

爲鄭相公讓中書侍郎平章事表

爲趙庶子謝平章事表

爲崔相公謝門下侍郎表

齊賓客相公進所賜馬狀

爲齊相公讓修國史表

盧相公謝授賓客表

爲盧相公謝除中書侍郎表

代盧相公謝賜方藥并陳乞表

第二表

第三表

第五表

第六表

代賈相公謝賜馬及銀器錦彩等表

代賈相公乞退表

代賈相公陳乞表

第二表

第三表

第四表

第五表

第六表

爲趙相公謝賜金石凌表

進詩狀

謝權知門下省過官狀

謝借飛龍馬狀

中書門下謝御製九日言懷賜中書門下及百寮

詩狀

中書門下奉和聖製九日言懷詩賜中書門下及百官詩進狀

中書門下謝御製重陽日中外同歡以詩言懷因示羣官一首狀

中書門下進奉和聖製重陽日中外同歡以詩言志因示羣官狀

中書門下謝御製九月十八日賜百官追賞因示所懷詩狀

中書門下進奉和御製九月十八日賜百官追賞
因示所懷詩狀

中書門下賀新製中和樂狀

中書門下進奉和聖製中春麟德殿會百寮觀新
樂詩狀

中書門下謝御製中和節賜百官宴集因示所懷
詩狀

中書門下進奉和聖製中和節賜百官宴集因示
所懷詩狀

中書門下謝聖製重陽日即事六韻詩狀

中書門下進奉和聖製重陽日即事六韻詩狀

欽定全唐文卷四百八十五

權德輿三

爲鄭相公讓中書侍郎平章事表

臣某言伏奉今日恩制授臣中書侍郎同中書門下平章事詔書自天受命惶悸俯伏循省不知所容中謝臣聞宰理中樞從古所重貞教化之本導陰陽之和外撫四夷內循百職或乖於是則謂曠官臣志在服儒才非經遠爰自筮仕期於代耕而遭時踰量踐歷朝序自奉禁中之職累叨望外之恩超貳冬官兼司選部流品未序銓綜乖方以

榮爲憂伏待譴責豈謂特延睿渥參列廟謀以瓶簪之資當柱石之重況臣自去夏尚守臺郎周月之間遂懸相印承陛下勵精之切副陛下則哲之明循量省躬必知不可伏乞俯迴詔命別選公才敢瀝血誠上黷天鑒無任惶懼懇迫之至謹奉表陳讓以聞

爲趙庶子謝平章事表

臣宗儒言臣伏奉今日恩制除臣爲同中書門下平章事祇奉承命捧讀詔書心魂震驚拜忭失所中謝臣聞變贊化源叅和鼎實上合一德以平六符苟非其所繫斯重

臣本虛薄素無器能徒以文藝獲承代業比肩多士陳力
清時累叨渥恩踐履官序頃歲奉職中禁草議南宮遂忝
左曹列於近侍顧常內訟已慮曠官豈謂宸眷特加擢任
非據伏自循省不知所安且臣去冬尚守郎吏今纔一歲
遂備台司苟非全才難塞公議雖鞠躬匪懈必盡事君之
誠而宣化賦政恐累知臣之舉生成難報覆餗是憂伏以
面奉德音不敢更有陳讓拜章感涕上答何階無任荷戴
惶懼之至謹奉表陳謝以聞

爲崔相公謝門下侍郎表

臣損言審已無庸謬膺寵授昨所陳讓迫於懇誠冀全至公豈敢外飾黃閣重務非才實難墨詔復臨捧讀增懼臣聞惟君知臣任之以器惟臣事君量而後入生逢昌運自比可封之人職在台司難逃竊位之責三年待罪無補威明再命逾涯轉速官謗天威咫尺愚慮屏營伏以令斷表章不敢累瀆宸宸雖誓心畢命以竭微衷而折足覆餗其如公議無任感恩惶懼之至謹奉表陳謝以聞

齊賓客相公進所賜馬表

臣某言臣頃待罪中樞特蒙睿渥旣切維鵜之刺又叨錫

馬之榮憂在忝曠積成疾瘵聖慈全貸尚列師賓見矜福
過之災猶積喜中之懼況茲天驥輟自御閑實有代勞之
功且期致遠之用特優賜與以寵宰司臣自改官卽合進
納而心力衰耗晦明纏綿筋骸自便惟在床衽視聽所知
不過湯藥沉疴餘息有異常人平居故事皆所廢忘頃年
愧懼已切於貧乘今日稽留自疑於奪魄因緣尸素積累
罪辜疎愚昧瞽殞越無地謹隨表奉進無任惶恐震懼之
至臣某頓首頓首謹言

爲齊相公讓修國史表

欽定全唐文

卷四百八十五

權德輿

三

臣某言臣去九日於延英對陛下勤求理本語及史官遂
命崔損承旨令臣兼修國史臣省已無取受恩殊常倉皇
震驚未及陳露今日中使某乙奉宣進止授臣此職竊自
思忖非所克堪感戴屏營不知所據伏以褒貶善否裁成
義類直辭是繫往哲攸難臣謬踐台司無補皇化每憂覆
敗上負聰明豈足以再紆宸慈累忝榮渥稽前古之彝訓
昭聖朝之法誠立言載筆豈易其人量力循涯自知不可
又自貞元四年李泌後宰臣遂不兼此職蓋以論著慎重
留於聖心自非時謂全才何以遠循故事用此內省以榮

爲憂況君舉必書時同堯舜之理任人以器顧無遷固之
能所覲殊私特寢成命無任感恩惶懼之至

盧相公謝授賓客表

臣某言伏奉今日恩制除臣太子賓客睿慈曲被宏貸特
加捧承命書感抃交集中謝臣以庸劣累叨鴻私無補廟
謀徒速官謗妨賢歲久嬰疾日深累陳愚衷上黷宸鑒敢
言知止誠以乞身陛下亭毒之恩不遺微細載紆詔旨尚
列賓師全度終始於臣爲厚跼天跼地空荷生成無任感
戴欣懼之至謹奉表陳謝以聞

爲盧相公謝除中書侍郎表

臣邁言伏奉今日恩制授臣中書侍郎同中書門下平章事祇奉詔命循省妄庸感恩量力不知所措中謝臣聞宰相者敘四時之化順萬物之宜用贊裁成使之茂遂而中樞密勿庶政本源以奉大猷是爲右弼臣實凡輩本無他能家尚儒風獲承緒業因緣忝幸踐履班榮誠不自意忽焉過量台司待罪已涉三年妨賢旣久內訟彌切蓋廉謹戒懼人之常分而訐謨教化宜擇全才陛下在宥萬方躬勤百度豈虞賤質再沐睿慈特遷紫微實玷皇極臣面所

陳讓推於至公天鑒未迴進退惶灼且使人以器知臣者
君猶冀鴻私俯察愚懇害盈之禍敢愛微軀覆餗之憂難
抑公議無任感恩怖懼之至謹奉表陳謝以聞

代盧相公謝賜方藥并陳乞表

臣邁言臣自染偏風今已彌月將息未減渥澤轉深伏蒙
特令供奉僧智昌醫療并每日令中使存問及賜柳湯煎
驢頭方仍便令服餌者顧以庸賤昧於攝理久茲竊位常
懼害盈陰陽之和無補時化風毒生疾上煩聖慈靈方御
醫稠疊備至雖受恩服藥誠合漸瘳而福過災生慮難自

保況中貴將命寵臨私門犬馬之微日塵黷續或有加減
自合上聞非常之恩伏乞停罷且台司要重庶政泉源以
臣平居素積官謗今右邊手足動用不隨自滯枕席已淹
弦晦伏乞以時免職使得養疾家居博求上才用塞人望
則公朝無覆餗之責陋質荷生成之仁今攝衣拜章力且
未足口占代署貴達愚衷無任感恩迫切之至謹奉表陳
請以聞

第二表

臣某言臣以疾病所要在假旣久自審不逮遂有上陳詔

旨優答懇誠未允屏營慚懼不知所安臣聞爲官擇人各司其局條責實效共致理平凡在庶僚猶不可曠況宰臣之任鼎足承君調和陰陽左右教化能否之下利害繫焉苟有所壅其傷必大以臣虛薄備位四年奉勵精之勤但樂昌運當具瞻之地莫副羣心書曰百僚師師百工維時言得其人也語曰陳力就列不能者止言審其分也況沉頓逾月冠帶未任風毒所侵難望速差彼已之刺倍切於今以被病之微臣尸台司之厚祿自知不可如公議何伏枕披誠再黷宸扆冀迴天鑒俯遂愚衷所謂曲成豈惟平

施無任惓欵迫切之至謹奉表陳請以聞

第三表

臣某言臣逼於疾瘵累有陳奏再奉詔旨私願未從感恩則深量力難濟況偏風狀候與諸疾不同雖時似少減終慮成沉痾中樞務重不可闕人自臣在假已四十餘日曠廢斯甚兢惶益深一夫不獲一吏不職則繫聖慮以之憂勞今臣手足未平心緒未復卧受豐祿胡顏自安伏惟陛下順天理物躬勤庶政事無細大咸遂其宜豈可獨私微臣久玷時化是以直疏誠懇不敢苟飾煩詞冒黷宸嚴期

於照鑒無任惶怖震越之至謹奉表陳請以聞

第五表

臣某言臣素以庸虛又嬰疾病半年在假未任出入四表上陳備盡誠懇過蒙渥澤特賜優容聖慈則深私願猶阻俯仰衽席兢惶靡寧臣本謂至春和得漸平復今方藥遍用根本未除雖簪帶假人得以被體而趨步無力難於拜恩輔臣之任百辟是仰遵守法度誠所宜先豈有踰歲家居尚塵鼎鉞況所受厚祿出於疲人竊位公朝尚知不可沉疴私室何以自安易象害盈實在今日伏惟陛下宏覆

萬物曲成不遺凡在懷生各得其所所以臣沉痾久曠官司
前後陳聞披瀝肝膽期切之至謹奉表陳請以聞

第六表

臣某言臣待罪非據歲時已深寵秩逾涯災患自至一從
移病忽及周月五獻章表未遂血誠沉痾之身滯於床枕
職守之効絕於官曹虛費祿廩不安夙夜遂於去年五月
二十五日進狀乞停俸錢自後不敢更有請受竊冀素餐
之責少息輿議丹懇之至上迴聖心邇來又經九十餘日
成命未下憂惶無措蓋聞祿以詔功又以養賢以臣之愚

而無功績久此尸曠俯仰內訟迫於公私臣之情理實爲
難處臣之言詞不能自達使得終獲退免曲遂微誠亭育
深恩實在於此無任猥迫懇欸之至謹奉表陳乞以聞

代賈相公謝賜馬及銀器錦彩等表

臣竑言今日中使某乙奉宣進止以臣所進關內隴右并
圖錄十卷特賜馬一匹并銀瓶盤等若干事錦彩等若干
疋者承命抃舞震驚失圖伏以聖朝覆幬無私聲教遠被
雖夏書禹貢周制職方重譯所通未若今日臣以末學獲
奉昌期常好地理之書頗知河湟之事明徵舊史博考傳

聞夙夜以思歲時遂久紀諸文字績以丹青上塵聖聰庶
備方志豈謂睿慈宏獎寵賚特深出珍華於內府下駟駿
於天廐恩榮所及煥麗相輝循顧虛庸曲承蕃錫負乘匪
服併切於今無任感恩荷戴之至謹奉表陳謝以聞

代賈相公乞退表

臣孰言臣以庸愚謬尸寵祿位居師長職重台司徒叨渥
恩無補時化跼蹐荏苒六年于茲去秋以來多病相繼每
自策勉以奉休明而筋骸內衰官謗外積近染痢疾綿歷
旬時進退之狀不恒寢食之理皆耗伏枕循省無所克堪

凡在常情皆願貴仕況臣累蒙任使實越等夷從容廟堂
沐浴天澤恩私歲久誠每切於匪躬疲繭日侵事有迫於
量力伏惟陛下覆育臨照曲成不遺俯矜愚衷移授散秩
則樞軸不曠輪轅適宜拳拳之誠所望斯足無任懇款惶
懼之至謹奉表陳請以聞

代賈相公陳乞表

臣竦言伏奉今日制條除臣檢校司空兼左僕射依前同
中書門下平章事祇荷成命捧戴恩私心魂震驚慙怖失
次臣以庸薄無他才能先朝過聽謬賜驅策叨居鼎鼐十

有三年猥承雨露之恩終闕涓埃之効累經陳乞未允懇
誠復以餘年再承休命自陛下紹膺寶厯澤被羣生亭育
所加飛沉遂性而臣齒髮頽暮疾恙嬰侵筋體日衰心力
皆耗況宰相之職用調陰陽司空之官實平水土從古授
受重難其人以臣平居猶知不可今中旣眩耄外亦支離
寢興不安言語失次豈可苟貪貴仕上玷清時省躬則然
況在公議古者君有致政之惠臣感得謝之恩鐘鳴漏盡
前哲所誠年衰疾劇在臣爲甚過於情理敢黷天威悽悽
血誠期在鑒聽無任懇欸恐懼之至謹奉表陳讓以聞臣

軫誠惶誠恐頓首頓首謹言

第二表

臣軫言臣以疾病所迫氣力不任輒露懇誠上祈退免聖
慈備至私願未從詔旨便蕃慰勉纖悉自宜策勵以奉休
明螻蟻之誠敢忘夙夜犬馬之疾日益纏綿視聽昏煩舉
措乖誤心不記事口不逮心神理害盈正謂今日昔韋賢
致仕著在漢庭韓厥請老書於魯史豈可以茲沉廢苟汗
班榮迫於公私非敢撝挹自聖明馭宇動植覃恩豈於庸
愚獨阻誠志乞迴天鑒俯遂殘生伏紙上陳感涕嗚咽無

任惶懼懇切之至謹再奉表陳乞以聞臣耽誠惶誠恐頓
首頓首謹言

第三表

臣耽言臣殘年沉痾漸不支持再表上陳未蒙允許顧茲
朽質徒感鴻私而枕席纏綿形神消耗上台之任歲月積
深大病之期晦明難保自叨升論道扶疾拜恩邇來狀候
日以羸瘠災因福過足驗於今伏乞賜臣骸骨收臣印綬
期於必遂不敢煩辭無任量力懇迫之至謹奉表陳乞以
聞

第四表

臣孰言臣聞生人所欲豈過富貴仕進之榮無踰公相臣受祿過厚叨恩且深疾瘵所侵日月以甚表章三上宸睴未迴忝然私室溘盡是慮臣頃歲齒及懸車疾經百日輒援禮令乞遂休閒先聖優容未蒙允許今則桑榆轉迫沉頓寢深比於往年遠不相及前後陳請備竭肺肝特希聖慈俯鑒愚懇羸骸假息所望退身瀝血披誠伏待明命無任屏營懇迫之至謹奉表陳乞以聞

第五表

臣竑言臣以庸愚累叨爵命大行皇帝拔擢非次列於宰
輔歲時寢深塵露無補太上皇踐祚聽政寵登三公而臣
寢疾所嬰已在牀枕沉痾日劇氣力漸微自春涉秋四表
陳乞伏遇陛下繼明纂統臨照萬方澄清化源朝野相慶
但臣百疾所湊四支不任豈使將盡之人猶處具瞻之地
私誠所迫上黷宸嚴旣非飾讓期在聽納無任懇款迫切
之至謹奉表陳乞以聞

第六表

臣竑言臣犬馬之疾福過災生前日以來轉就危困自量

氣力的不支持自陛下嗣纂睿圖臣以寢疾綿亟竟不得
一趨雲陛上謁龍顏幽壤之中以此爲恨臣備位宰相歲
時最深永歸泉下無補明代伏惟陛下爲萬姓自愛則幽
明蒙福無任感恩哀戀之至謹奉遺表以聞

爲趙相公謝賜金石凌表

臣憬言伏奉恩敕賜臣金石凌并方及服法并金花銀合
一又賜臣蘇膏方及眼赤有瘡方其方皇太子書者鴻私
榮貺特發天心受恩拜賜慚怖交集中謝臣聞台司之任
茂遂羣生而攝衛乖宜自貽病疾理身未暇賦政何堪豈

謂上簡宸衷下矜賤質御方靈藥稠疊寵光劑和至精減
聖躬所服翰墨元妙降皇儲之書仰光輝而陋目增明承
渥澤而沉疴自愈致金石之固通性命之和保持誨諭曲
盡慈旨蠲其煩滯授以康寧省已何功害盈知懼伏惟陛
下宣布大和則時無疵癘懋建大中則物以阜安生及昌
期自登壽域況臣劣薄待罪樞衡感平施而已深荷殊榮
而難報雖陰陽不測犬馬之疾頓瘳而日月無私螢燭之
光何補生成覆載皆稟睿慈竭力致命豈申愚效無任感
恩惶懼之至謹奉表陳謝以聞

進詩狀

右宰臣奉宣進止令臣進舊詩者伏惟陛下以聖德文明化成天下徵詩之旨本在樞衡念舊之仁因及簪屨臣頃尸重任久曠官常今列大僚猶叨寵渥於孔門非賜也言詩之目在漢庭異匡氏說詩之工徒積繁蕪豈近聲律自承休命伏用兢惶待罪之時無補公餽免退之後猶獻雕蟲旣乖法言有黷宸聽震悚怵惕不知所安謹錄前件詩五十首奉進無任慚恩隕越之至謹奏

謝權知門下省過官狀

右臣奉恩命權知門下省過官者伏以過官至重事在黃
樞閱郡吏之否臧布百職於中外苟或非當其傷實多臣
自玷台司忽及半載一昨陳乞天睠未迴當憂惕之中而
寵榮薦至摩頂至踵豈酬鴻私無任感恩荷戴之至謹奉
狀陳謝以聞謹奏

謝借飛龍馬狀

蒙恩借飛龍馬三匹

右今月十日中使張少禹至長樂驛奉宣進止借臣前件
馬送出府界者臣以庸薄謬叨恩私寵榮沓至感戴難處

以今月十五日至東驛出京兆府界天關儲胥仰瞻日遠
御閑蹠蹠假借恩深仰元澤以難酬顧微生而何幸況代
勞比君子之德負乘積小人之憂感戀明庭涕泗橫積當
君陳之寄必竭肺肝羨驤裊之迴恨無羽翼無任感荷戀
慕之至謹奉狀陳謝以聞謹奏

中書門下謝御製九日言懷賜中書門下及百寮
詩狀

右中使王敬親至奉宣恩旨賜臣等前件詩者伏以聖人
之言律度天下特降睿藻發於深誠極三代之質文致萬

方於仁壽時當令節慶屬豐年同在鎬之和樂異橫汾之
靡曼臣等謬居樞近每沐鴻私空瞻日月之光難酬雨露
之施無任感恩抃躍之至謹奉狀陳謝以聞

中書門下奉和聖製九日言懷詩賜中書門下及
百官詩進狀

右今月九日中使王敬親至奉宣恩旨賜臣等前件詩者
日月麗天萬物皆覩韶威度曲八音克諧伏惟陛下有堯
之文思舜之恭己每睿詞下降皆以人爲心故宴樂以示
慈惠詠歌以昭教化歡令節慶有年順時賦政之祥也敦

九族安萬邦自中發外之澤也然後以太平之化躬行於
今知之非難是謂至德豈比夫漢武魏文屬詞類事而已
臣等叨居近侍首沐湛恩空仰昭回難酬覆露謹各獻奉
和聖製詩一首輒以蕪鄙上黷宸聰庶達封人之心敢比
賡歌之義無任感恩戰懼之至謹詣延英門隨狀封進以
聞

中書門下謝御製重陽日中外同歡以詩言懷因
示羣官一首狀

右中使劉希昂至奉宣進止賜臣等上件詩者伏以陛下

順用二儀曲成萬物王道正直天文昭回因令節以宴樂
發睿慈於歌詠煥然麗藻丕變時風慶屬有秋化覃無外
凡百臣庶一其歡心臣等忝備台司首承渥澤無任感戴
欣躍之至謹奉狀陳謝以聞

中書門下進奉和聖製重陽日中外同歡以詩言
志因示羣官狀

右今月九日中使劉希昂至奉宣進止賜臣等前件詩者
臣聞惟天聰明惟聖時憲故三辰爲章六義成文伏惟陛
下端拱穆清慮必周於皇極錫宴重九恩每覃於百寮煥

發睿詞化成天下書於右史實邁前王臣等才異賡歌職
叨近侍在宥之化皆獲可封聞韶之時忽焉竊抃謹各獻
奉和聖製詩一首輒以荒鄙輕黷天威無任感恩戰慙之
至謹詣延英門隨狀封進以聞

中書門下謝御製九月十八日賜百官追賞因示
所懷詩狀

右中使楊光瑤至奉宣恩旨賜臣等前件詩者睿詞炳煥
降自九霄天澤昭臨榮加百辟旣晞湛露又沐卿雲感金
石之和聲助林塘之霽色況錫宴之際極其寵光求理之

金
深播其雅頌樂以發德文以化成由其歡心盡躋壽域跪
捧三復備見皇慈臣忝跡樞密親承聖渥無任感恩抃躍
之至謹奉狀以聞

中書門下進奉和御製九月十八日賜百官追賞
因示所懷詩狀

臣比年以三令節賜百僚宴賞昨者時及重九陰雲未收
特延聖慈又改良日中宴之際俯降睿詞猶元氣之涵煦
比慶霄之紛郁裁有六義昭示萬方湛恩自天具物知感
況陛下以誠信施教以慈愛緣情形於詠歌繫在風化伏

以唱和之重合綴庸音而動植之微何酬元造臣等忝居
樞近首沐鴻私竊忭率舞不能自抑謹獻奉和聖製詩一
首詞理鄙淺輕冒宸嚴無任感恩喜躍之至謹詣延英門
隨狀奉進以聞

中書門下賀新製中和樂狀

右中書門下奏今月七日伏蒙聖恩賜臣麟德殿宴會觀
上件新樂臣聞先王作樂必本人情所以崇德所以辨政
伏惟陛下以大中設教以大和育物肇創嘉節於今十年
年皆順成俗以仁壽今則睿謀廣運度曲惟新三才位序

邁韶咸之美八卦成象見天地之心制氏未覩其鏗鏘伶
官甫披其行綴聲歌所感遐邇同歡臣等職忝台司時逢
交泰昨已面有奏陳請付有司頒示四方永光樂府仍請
編入史冊伏望天恩允臣所奏

中書門下進奉和聖製中春麟德殿會百寮觀新
樂詩狀

右今月七日伏奉聖恩賜百僚麟德殿宴會羣臣觀新樂
并賜臣等聖製詩序者伏惟陛下法天授人順時布政中
和制樂以協六律之音元首作歌以廣百工之業感於順

氣諧此正聲春臺煦然生物資始洽慈惠於臣庶播易良
於國風照燭乾坤輝動金石臣等獲叨近侍曲被湛恩旣
在藻以遂性亦聞韶而忘味敢附典謨之末顧慙賡載之
詞謹各獻奉和聖製詩一首謹詣延英門隨狀封進以聞
中書門下謝御製中和節賜百官宴集因示所懷

詩狀

右今日中使薛盈珍至奉宣進止賜臣等前件詩者臣聞
天以雲漢爲章昭回於上人以文義爲紀化成於下伏惟
陛下勤慮理本合於中和月當中春日乃初吉特降藻思

金史卷之二十三
助其發生由勾萌以至於暢茂推誠信以均其化育捧戴
殊觀如登春臺慶霄天籟耳目清超凡在百辟一其歡心
臣等謬列台司首承慈渥無任慶抃踴躍之至謹附狀陳
賀以聞謹狀

中書門下進奉和聖製中和節賜百官宴集因示
所懷詩狀

右今月一日中使薛盈珍至曲江會所奉宣恩旨賜臣等
前件詩者上齊二曜旁合八音闡文教於休明叶昌期於
亭育況茲令節克順人心延仲月以違晦撰良辰而得一

欽定全唐文卷四百八十六目錄

新文藝出版社叢書

權德輿

四

論江淮水災上疏

上陳闕政

請置兩省官表

論度支疏

論裴延齡不應復判度支疏

奏于董所犯當明刑正罪疏

奏孝子劉敦儒狀

中書門下謝雨雪量放朝參表

謝除太常卿表

東都畱守謝上表

謝批答表

謝追贈表

謝贈先祖尚書禮部郎中表

請追贈先祖故羽林軍錄事參軍狀

謝手詔不聽迴官秩表

請祔廟狀

請遷祔先父準一品儀式狀

緣遷祔請令子弟營護狀

謝許遷祔并令子弟營護詔表

請遷舉假內差官勾當狀

遷舉假滿勾當公事狀

遺表

欽定全唐文卷四百八十六

權德輿

四

論江淮水災上疏

八月日將仕郎守左補闕臣權德輿謹昧死頓首上疏皇
帝陛下臣聞書曰百僚師師百工惟時又曰理亂在庶官
然則獻替之司任當耳目所以達下人之利病廣君上之
聰明惟野人炙背之微齊士九九之賤獎其誠心不致於
罪伏惟皇帝陛下以大中大和武功文德亭育天下十有
四年車書所至聲教大備微臣生逢明代官忝諫曹旣當

不諱之辰敢陳無隱之直伏以人爲邦本食爲人天或陰陽之候暫憊水旱之沴小至匹夫匹婦未安其家納隍之心則有所軫臣伏見自去年六月已來關東多雨淮南浙西徐蔡襄鄂等道霖潦爲灾者二十餘州皆浸沒田疇毀敗廬舍而瀕淮之地爲害特甚因風鼓濤人多墊溺其所存者生業半空江東諸州業在田畝每一歲善熟則旁資數道春雨連夏農功不開人心旣駭亡者則衆幸者京師歲稔夏麥又登誠爲根本之固以保斯箱之慶然賦取所資漕輓所出軍國大計仰於江淮以陛下憂勞萬務勵精

爲理之若是而天灾尚至者將使陛下聖慮日新又日新而儆戒之耶不然臣所未喻也誠灾不勝德賦有定制倘又留聖念因而拯之斯實代天理物爲人父母之明徵也伏望與元老台司定議速下德音遣使臣之有明識通方者將恤隱之命盡勞徠之方訪其疾苦蠲其租入與連帥守長講求所宜鰥寡幼艾周知其病詔令所下自如豐年休嘉感通疵癘銷散況賦無工拙加取於人不若藏於人之爲固也蓋俾有司析量入之數節經用之源務求便安以去冗費縱灾害不甚陛下過而憂之無乃益聖德之光

大乎元元皇帝之三寶曰慈曰儉曰德明皇帝之昌言曰
在知人在安人此陛下已行之效在恒久而已在敦固之
而已臣每讀漢書至賈誼谷永之徒數陳理道痛言得失
漢朝不以受之爲貶數子不以言之爲罪我太宗文皇帝
之有天下也魏徵王珪等危言正詞上裨大化無疆之祚
實兆於斯伏惟陛下遠覽西漢之風近師文皇之德則凡
百臣庶敢盡其詞臣鄙賤頑固不識忌諱旣竊官命豈敢
愛身蓋有所聞則合上獻雖蹈鼎鑊猶生之年不勝懇款
惶恐之至伏惟陛下裁擇謹奏

上陳闕政

陛下齊心減膳閔惻元元告於宗廟禱諸天地一物可祈
必致其禮一士有請必聽其言憂人之心可謂至已臣聞
銷天災者修政術感人心者流惠澤和氣洽則祥應至矣
畿甸之內大率赤地而無所望轉徙之人斃踣道路慮種
麥時種不得下宜詔所在裁留經用以種貸民今茲租賦
及宿逋遠貸一切蠲除設不蠲除亦無可斂之理不如先
事圖之則恩歸於上矣十四年夏旱吏趣常賦至縣令爲
民毆辱者不可不察漕運本濟關中若轉東都以西緣道

倉廩悉入京師督江淮所輸以備常數然後約太倉一歲計斥其餘者以糶于民則時價不踊而蓄藏者出矣大厯中一縑直錢四千今止八百稅入加舊則出於民者五倍其初四方銳於上獻爲國掊怨廣軍實之求而兵有虛籍剝取多方雖有心計巧厯能商功利其於割股啖口困人均也比經紉放者自謂技拭無期坐爲匪人感傷和氣而冬薦官踰三年未受命衣食旣空湓然就斃此亦窮人之一端也近陛下洗宥紉放者或起爲二千石其徒更相勉知牽復可望惟因而宏之使人人自効

請置兩省官表

臣德輿言臣聞堯之爲君也百工允釐舜之官人也九德咸事伏惟陛下文明御寓建用大中德厚侔於二儀利澤施及四海中外庶政寢興求思舉一事必稽於禮法命一官必詢其望實故朝無虛授時絕幸人厲精萬樞超冠前古可封之俗比屋相歡詩曰嗟我懷人寘彼周行言思其才也又曰翹翹錯薪言刈其楚言選於衆也蓋在旌別能否循責功實以爵祿爲砥礪以羣才爲銚刃則舉不失職人効其能左右掖垣首承詔命奉行詳覆各有攸司然後

下於中臺頒於海內誠至重也彌綸政事侍奉軒墀分曹
十員今則殆絕昔衛多君子晉有卿材況巍巍聖朝淳化
所被濟濟多士豈謝古人要重之司曠闕旣久則事有所
壅吏得爲非亦慮四方聞知謂朝廷乏士事關理道豈止
官常臣以凡庸過蒙慈渥塵汗清近超越等倫前後對敷
備承獎飾德音顧問魂爽震驚而朴訥孱微不能自達又
去年四月三日面奉進止令臣有所見卽條疏奏來者輒
以愚管手疏上陳干黷宸嚴伏待罪責無任兢懼隕越之
至謹奉表以聞

論度支疏

十一月十二日將仕郎守右補闕臣權德輿謹昧死頓首
上疏皇帝陛下臣聞建官惟賢任人以器細大畢效輶輻
無遺蓋就其所長以求至當古人所以有憂於趙魏而劣
於滕薛敗於栗邑而理於頻陽誠才各有所極也伏見司
農少卿權判度支裴延齡早以文學累居官次固而似守
刻而少通徒有專謹之心且非適時之器往者貳大農之
卿長司太倉之出納號爲稱職蓋有恒規陛下急於獎能
切於賞善權委邦賦冀有成績且度支所務天下至重量

入爲出從古所難使物無遺利而不可竭竭則害生類使
奸無隱情而不可刻刻則傷人和調其盈虛制其損益上
繫邦本下繫元元苟非全才通識則有所壅自延齡受任
已近半載羣議紛然皆曰非宜且權其輕重固與守之之
才不同邊儲經費之功懋遷移用之法貴無留事以酌乎
中簿領簡書周行郡國失於毫釐利病相萬一物未理所
軫皇情而延齡切於感恩昧於量力思有以效強所不通
則有枉尺直尋之心多方自固之計吏伺其隙人售其奸
因緣蒙蔽觸類滋長致遠恐泥學製實傷異時其敗罪之

何補伏料聖意久未正授延齡職名似觀其能否以爲進退官司閭里衆口一心評議諠譁所不可遏伏望與一二宰臣時有裁議或詔問度支郎官使得以事實條對苟言者謬妄蓋有以辯之或才實未稱恐難久處倘擇能代命以他官以全延齡以便天下上副求理之意下遂陳力之宜則事任交修職業不廢臣忝備員陛下諫諍之官常服師訓緘默自負無以爲容阮嗣宗口不言人之短臣心常師之但以束帶立朝則異於是職當獻納豈敢顧身耳有所聞目有所見義在無隱以奉聖明言而獲戾臣之死所

不勝愚瞽惓欸之至伏惟陛下裁擇謹奏

論裴延齡不應復判度支疏

臣伏以爵人於朝與眾共之況經費之司安危所係延齡頃自判權逮今旬歲不稱之聲日甚於初羣情眾口喧于朝市不敢悉煩聖聽今謹畧舉所聞多云以租賦正額支用未盡者便謂之剩利以爲已功又云破官錢買常平先所收市雜物遂以再給估價用充別貯利錢又云邊上諸軍皆至懸缺自今秋以來並不支糧伏以疆場之事所虞非細誠聖謨前定終事切有司陛下必以延齡孤貞獨立

爲時所抑醜正之黨結此流言何不以新收剩利徵其本
末令分析條奏又擇朝賢信臣與中使一人巡覆邊軍察
其資儲有無虛實倘延齡授任以來精心勤力每事省約
別收羨餘于正數各有區別邊軍儲蓄實猶可支身自斂
怨爲國惜費自宜更加優獎以洗羣疑明書厥勞昭示天
下如或言者非謬罔上實多豈以邦國重務委之非據臣
職在諫曹合採羣議正拜已來今已旬日道路云云無不
言此豈京師士庶之衆愚智之多合而爲黨共有讎疾陛
下似宜稍迴聖鑒俯察羣情

奏于董所犯當明刑正罪疏

竊以董溪等當陛下憂山東用兵時領糧料供軍重務聖心委付不比尋常敢負恩私恣其贓犯使之萬死不足塞責宏寬大之典流竄太輕陛下合改正罪名兼責臣等疎畧但詔令已下四方聞知不書明刑有此處分竊觀衆情有所未喻伏以自陛下臨御已來每事以誠實與天地合德與四時同符萬方之人沐浴皇澤至如于董所犯合正典章明下詔書與衆同棄卽人各懼法人各謹身臣誠知其罪不容誅又是已過之事不合論辯上煩聖聽伏以陛

下聖德天姿度越前古頃所下一詔舉一事皆合理本皆
順人心伏慮他時更有此比但要有司窮鞫審定罪名或
致之極法或使自盡罰一勸百孰不甘心巍巍聖朝事體
非細臣每於延英奏對退思陛下求理之言生逢盛明感
涕自賀況以愚滯朴訥聖鑒所知伏惟恕臣迂疎察臣丹
懇

奏孝子劉敦儒狀

孝子劉敦儒年四十九

曾祖子元祖況父
浹住東都從善坊

右件人名儒史官之家積成教義至性誠孝感動人倫母

患風狂心緒乖亂無辜榜筆常至僵仆或凍於積雪之下
或曝於赫日之中腐爛皴瘡略無完體見其楚毒方肯飲
食敦儒蘇而復起常懼人知承順恬然不覺疾痛因心之
道貫於神明欲蓋彌彰事久方著蒸蒸不匱十有六年貞
元二十年留守韋夏卿具狀奏聞奉其年八月二十九日
勅宣付史館旌表門閭臣至洛都具詳事實聞諸族類布
在風謠今又十年不改其養饑寒所迫衣食闕然晨昏所
奉朝不繼夕伏以底祿筮仕資蔭多門至行絕人尤可嘉
獎伏望天恩特授一解褐京官使分司就養則私計可給

寸祿爲榮庶厚時風以宏孝理伏乞聖慈允臣所奏謹錄
奏聞伏候敕旨

中書門下謝雨雪量放朝叅表

臣某等言伏奉今日進止卿等朝列是常或陰雨不聞鼓
聲則不免犇波走馬忽有墜損深軫朕懷自今已後縱鼓
聲差池亦不得走馬并時暑稍甚及雨雪泥濘亦量放朝
叅者伏以夙興趨朝辨色就列臣下之制則惟其常陛下
特降殊私上煩深慮當宵衣之際念陳力之臣或恐鼓聲
差池登車犇迫至憂暑雨遂及祁寒俯戒馳驅特寬朝請

曲成周於萬物厚澤浹於四時恩出非常事超前載臣等
謬居樞近首奉德音無任忻忭感戴之至謹奉表陳謝以
聞

謝除太常卿表

臣某言伏奉十月二十四日詔命除臣太常卿統和神人
典司禮樂臣實庸菲謬叨寵榮臣某誠惶誠恐頓首頓首
臣以書生凡輩懦弱無堪生遇昌期累膺爵秩四掌誥命
五居列曹遂叨禮卿乃佩相印竟無微効上答皇明自罷
宰司再履宗伯旋忝保釐之任屬當優寄之時淮甸多虞

周郊接壤上勞聖慮下輯戎師臣不敢愛身不敢避事頻
抗手疏備陳物宜苟披肺肝莫識忌諱自承詔旨許募新
軍實使懦夫增氣輒思仁者有勇繕修器甲招集驍雄每
竭一心敢有二事陛下憂臣不逮全度特深出於殊私遽
降新命沐浴皇澤從容大僚量力無庸庇身何幸況太常
者伯夷叔孫通之職臣豈其人五六年間再居此地感恩
知懼循分難任卽以今月三日進發瞻望闕庭踴躍欣忭
謹奉表陳謝以聞無任感戴喜懼之至臣某誠惶誠恐頓
首頓首謹言

東都留守謝上表

臣某言伏奉今月三日制命授臣檢校吏部尚書兼御史大夫充東都留守判東都尚書省事以今月二十四日到東都上訖榮渥特加寵光備至俯仰印綬慚懼交懷臣某中謝臣才不出眾祿期代耕因緣文字進越名級自聖明臨御特沐鴻私厯五曹之貳居九卿之長遂叨大任忽涉四年智慮孱愚言辭朴訥徒淹歲月莫展涓埃雖竭匪躬之誠竟乖陳力之效自免樞務猶忝春官纔經半歲復授今任前後所厯皆不因人無非睿獎以至崇大況留守所

寄東夏式瞻在君陳畢公之選兼天官府憲之重面辭之
日親奉聖謦式遏匪人整訓戎事用資竊發必資兼材豈
臣懦弱所宜負荷今兵力至微武備不足此皆天鑒所察
臣不敢累黷聰明杜其奸情亦在早計必冀磨礪鉛鈍罄
竭肝心忠以事君死而後已違離宸睠感戀闕庭以陛下
注意之恩誓微臣捐軀之節無任荷戴屏營之至謹差押
衙試殿中監成黨奉表以聞臣某誠惶誠恐頓首頓首謹
言

謝批答表

臣德輿言昨日中使劉履謙至伏奉聖恩批答令臣卽斷章表者臣以庸薄無他材能先朝駢策謬掌文誥因緣荏苒累踐班榮每自尋省常憂顛覆至於經理代務非所克堪伏以陛下推擇宰司萬方觀德謀猷化本宜得全才此臣所以尤不自安披瀝肝膽冀狗由衷之請不傷則哲之明鴻私猥加愚懇靡遂雖盡忠極慮不敢愛身而辱滯顛蒙難逃其責伏讀詔命焚灼在懷誓心畢命難酬萬一無任感恩荷戴戰懼之至謹奉表陳謝以聞臣德輿誠惶誠恐頓首頓首謹言

謝追贈表

臣德輿言伏奉今日恩制臣亡父贈太子少傅先臣某追贈太子太保寵靈所及徽數特加捧承命書感奉酸咽臣某誠惶誠荷頓首頓首伏以先臣在天寶末年筮仕幽朔艱貞特立忠孝兩全名節冠於古今風聲激乎天下以執憲載筆逮事肅宗稟命不融早違昭代臣齟齬之歲孤苦零丁遭逢昌運漸履名級過叨睿獎忽至台司無能受祿莫與臣比以先臣之名器未稱餘慶或鍾以陛下之寵秩逾涯此生何幸所建家廟實稽國章時及春祠禮從祔饗

豈謂聖慈曲被孝思是崇當啟匱題主之時有告第漏泉之命感深霜露禮盛烝嘗自葉流根實荷非常之澤摩頂至踵難酬不次之恩幽明交感山岳非重無任祇荷隕越之至謹奉表陳謝以聞臣某誠惶誠荷頓首頓首謹言

謝贈先祖尚書禮部郎中表

臣德輿言伏奉今月十九日制命臣亡祖右羽林軍錄事參軍倕追贈尚書禮部郎中號捧詔書欽承追錫聖慈孝理輝耀幽明流根漏泉感涕嗚咽臣某誠惶誠荷頓首頓首亡祖德風自振才命不倫人文推於士友天爵茂於仁

義微臣虔守家法祇荷門風逮事之養不申貽謀之慶斯
集累叨將相備極名器臧孫有後豈臣敢當陳羣慙德在
臣爲甚乃者以改卜封樹輒披肺肝因先人之祖載加亡
父之徽命乞上印綬以延哀榮豈謂微誠竟回聰聽德音
煥發贈典褒優飾卽位以彌綸被大夫之物采儀曹繹禮
幽壤生光恩波曲臨負戴無力將誓畢命以答殊私無任
感恩哀荷之至謹差進奏官某乙奉狀陳謝以聞臣某誠
惶誠恐頓首頓首謹言

請追贈先祖故羽林軍錄事參軍狀

右臣亡祖仕於開元天寶之際文行聲實推重士林稟命
不融竟沉下位與當時清名之士席建侯包容蘇源明友
善特深唱酬文章各在集錄義方流澤以及先臣忠孝名
節聞於天下累蒙追錫備極哀榮逮至微臣實荷祖訓猥
以瑣劣過叨鴻私今檢校官兼官並至三品勲官及爵並
至二品玷冒斯甚曠敗是憂況臣本官興元尹足領當道
使務理戎撫俗不假他官其檢校吏部尚書兼御史大夫
并散官勲爵並乞削免迴充亡祖追贈則殘生展霜露之
感幽壤荷日月之光今先臣改葬輅就路亡祖舊域松

櫝是依倘因此事特沐恩禮使貽厥之報俯遂良誠罔極之懷下申先志聖朝孝理橫絕古今悽悽肝血敢此披瀝無任哀懇迫切之至謹遣進奏官押衙朝議郎前金牛縣主簿張儼奉狀陳乞以聞謹奏

謝手詔不聽迴官秩表

臣德輿言伏奉今月五日手詔以臣亡祖褒贈自是典章豈必更迴官秩已詔追榮良增嘉歎者渥澤滂濡詔旨嘉獎捧戴哀絕感恩失圖臣某誠惶誠恐頓首頓首臣叨逢聖明付授踰量常慮顛墜不任驅策況以藩方之重豈假

臺省之兼昨因遷祔輒有陳乞所願少減名器獲申哀榮
仰塵黻纁懼在鼎鑊豈謂天道下濟懇誠上通三復詔命
五情震駭儒飾備至發於聖心弱質無膺旣玷聿修之德
湛恩難報益馳匪懈之誠無任哀惶感荷之至謹遣進奏
官押衙朝議郎前行興元府金牛縣主簿張儼奉表陳謝
以聞臣某誠惶誠荷頓首頓首謹言

請祔廟狀

臣亡父先臣秘書省著作郎贈太子少傅某

右臣先臣在元宗朝筮仕河朔忠孝名節冠於當時至德

乾元之間歷監察御史起居舍人著作郎在代宗朝早違
聖代臣幼丁荼蓼不及義方過蒙渥恩祿秩崇厚按開元
禮文合立私廟三室永懷怵惕思展吉蠲已於通濟坊修
建擇用二月二十日祔饗臣位忝台司時逢孝理事循彝
典禮展私誠感戴恩榮不敢不奏聞伏聽敕旨

請遷祔先父準一品儀式狀

右臣亡父取七月十五日於東都遷祔贈官是一品準式
合有鹵簿幔幙人夫等謹錄奏聞伏聽敕書

緣遷祔請令子弟營護狀

山南西道節度觀察處置等使銀青光祿大夫檢校吏部
尚書兼興元尹御史大夫上柱國扶風郡開國公臣權德
輿右臣亡祖松栢先在東都臣幼年流寓江都夙蒙鍾罰
亡父母於潤州安厝今歲在丁酉是商姓通年取四月二
十日於潤州啟舉七月十九日於東都遷柩臣孤單零丁
早失嚴訓寵榮累集霜露感深至於歲時難遇吉便常恐
忽先犬馬莫展私誠伏以守土理戎不敢自求營護欲遣
子弟專往不敢不先事上聞謹錄奏聞

謝許遷柩并令子弟營護詔表

臣德輿言伏奉今月十五日手詔許臣遷祔并令子弟專
往營護者捧承詔書曲遂私志感泣嗚咽激於肝心臣德
輿誠惶誠荷頓首頓首臣以童胤之年遭家不造壤樹所
寄權在江南累經追崇常異徽數今龜筮叶吉月日有時
伏蒙聖慈伏賜鑒察恩詔下降特允懇誠孝理所覃幽明
知感松楸改卜永異事於九原蒲柳餘年冀酬恩於萬死
無任感戴悚惕之至謹遣押衙朝議郎前興元府金牛縣
主簿張僊奉表陳謝以聞臣某誠惶誠荷頓首頓首謹言
請遷舉假內差官勾當狀

臣某伏奉去二月十五日詔命許臣遷祔起四月二十日至七月十五日合在準式假內使事請令攝節度副使檢校尚書水部員外郎兼殿中侍御史樊宗師勾當其府事請令少尹王士郎勾當其間四使各有判官若事關師旅錢穀稍要重者并須有聞奏者臣自躬親不敢闕事謹錄奏聞伏聽敕旨元和十二年四月十日使奏

遷舉假滿勾當公事狀

右伏準去二月十五日詔命許臣遷奉自四月二十日至七月十五日合在假內今準假滿以今月十六日勾當軍

府公事謹錄奏聞謹奏

遺表

臣某言生逢聖時獲事陛下以臣慙朴備位將相幸免罪戾實無裨補福過災生二年以來腳疾痺緩近自旬日咽喉氣痛漸就危惛慮不支持永辭聖明涕流嗚咽伏惟皇帝陛下繼十一葉休運承二百年景祚平吳定蜀掃蕩淮夷巍巍功德與天地準今縱有疥癬不足平夷伏惟以愷悌之仁宏寬大之本爲九州自愛使萬古同福則臣幽冥之下同生物受賜無任感恩攀戀悲激之至